

Қазақ ұлттық университеті
филология факультеті
«Әдебиеттану» мамандығының
1-курс студенттері Абай ілімі
пәнінің оқытушысы Гүлжан
Ыбырайқызының
ұйымдастыруымен «Абай ілімі»
пәні бойынша «Абай ілімінің
құрамдас бөлімі: ақыл, қайрат,
жүрек» атты пәнаралық ашық
тәрбие сағатын өткізді.

Тәрбие сағаты Абай іліміне арналды



Ашық сабақтың мақсаты – білімгерлердің Абай ілімімен сусындап, рухани бай, танымдық өрісін кеңейтуге мүмкіндік жасау. Сабақ барысында студенттер білім мен өнерді ұштастыра отырып, өздерінің сегіз қырлы, бір сырлы екенін барынша танытты. Сергіту сәтінде «Желсіз түнде жарық ай» әні топтың қатысуымен орындалды. Алғашқы сөз кезегі абайтанушы-ғалым, доцент Ләйлә Жұматайқызына беріліп, ол өз сөзінде Абайдың рухани әлеміне, кеңістігіне тоқталып, студенттерге сәттілік тіледі. Абай ілімінің құрамдас бөліктері бойынша топ студенттері Ғаниза Бөкенбай, Нұргүл Әжімбетова, Оралбек Нұрмұхаммед ақыл, қайрат, жүрек сипаттамаларын жан-жақты ашып, арнайы тоқталып өтті.

Ашық сабаққа «Түркітану» мамандығының студенттері де белсене қатысып, «Абайдың кісілік кодексін» жатқа айтып, келген қонақтарды сүйсінтті. Бұл сабақта ән де, күй де, қара өлең де болды. Перизат Балғынбаева, Нұрмұхаммед Оралбек, Айсұлу Орынбасар күмбірлеген қазақтың қара домбырасымен күй тартса, Фарид Рашид, Таңнұр Жеңіс, Радомира Айтасқызы, Темірлан Азат, Нұргелді Әсіпбай Абай атамның қара сөздері мен өлеңдерін ерекше тебіреніспен, ыстық махаббатпен орындап шықты. Сонымен қатар Ақтілек Қасен, Айгерім Қасымхан қоңыр дауыспен Абай әндерін орындап, көптің көңілінен орын алды.

Таңнұр Қуаныш пен Бибінұр Асланбек те шараны барынша қызықты өткізіп, жүргізушілік қырларынан танылды. Сабақ барысында Абай ілімі бағыты бойынша интеллектуалды ойын ойнатылып, студенттер таным көкжиегін кеңейте түсті.

Ашық әңгіме сағатына қатысқан ұстаздар Жолдас Мәмбетов, Ерхан Кәрбозов, Бибігүл Дәулетқызы өз пікірлерін айтып, ұйымдастырушыларға ерекше бағасын берді. Жас әдебиеттанушылардан болашақ зерттеуші, ақын, жазушы шығатынына сенетіндерін айтып, үлкен қолдау білдірді. Сабақ соңында «Көзімнің қарасы» әні шырқалып, Гүлжан Ыбырайқызы барлық студенттерге Абайдың қара сөздері және даналық сөздері жинақталған кітапты, арнайы дайындалған «Абайдың кісілік кодексі» жадынамасын естелікке сыйға тартты. Тағылымға толы, әсерлі әдебиеттанымдық кеш болды.

Шоқан ШОРТАНБАЙ,
топ куратор-эдвайзері